



Juan Irausquin y Ike Cohen

Gobierno a dedica Dia Mundial di Turismo na dos lider pionero den turismo




ORANJESTAD (AAN): Diamars 27 di september en conexion cu "Dia Mundial di Turismo" a tuma luga un ceremonia y ponemento di kran na Plaza Juancho Yrausquin pa relexion riba e esfuerso di cada trahado den henter e industria turistico, for di esnan cu ta traha den sector hotelero, pa esnan cu ta traha na aeropuerto y taxistanan.

Pero tambe a honra y dedica e dia na dos lider pionero den turismo, señor Juan Enrique Irausquin y señor Ike Cohen. Prome Minister Evelyn Wever-Croes den su discurso na e ocasion, a conta e storia d

ambos persona enfatisando e esfuerso cu cada un a haci pa nos industria turistico.

E industria turistico di Aruba a inicia cu vision di un lider cu a mira mas leu den temponan dificil despues di guerra. El a pensa cu kisas un dia e refinaria lo no tey mas y cu Aruba lo mester ta prepara. Number di e persona aki ta señor Juan Enrique Irausquin. Despues di a traha como bankero pa hopi aña, señor Yrausquin a dreña den politica y na 1949 el a lanta su propio partido politico PPA. For di 1955 pa 1975, Juancho Yrausquin y



su partido a goberna Aruba cu un mayoria absoluto na varios ocasion.

Hunto cu su man drechi den gobernacion, sr. Oscar Henriquez, señor Yrausquin a convence empresarianan pa kere den Aruba y den nan plan. Despues di establece e planta di awa y coriente pa Aruba, a expande Aeropuerto cu un pista nobo, a traha boulevard y a traha cu e miho arkitectonan di Merca, pa diseña Aruba su prome hotel grandi, Aruba Caribbean Hotel. E hotel aki a bira e carhi di invitacion internacional di Aruba, pa invita turistanan for di Merca, Europa y henter mundo pa pasa nan vacacion riba nos isla. Awe, riba Dia Mundial di Turismo 2022 ta conmemora cu 60 aña pasa (20-06-1962) señor Juan Enrique Irausquin a fayece. Ademas a conmemora cu 15 aña pasa e exitoso empresario/hotelero masha stima señor Ike Cohen a bay laga nos. Despues di a perde su mayornan y

ruma den segunda guerra mundial, señor Cohen kier a cuminsa un bida nobo den un pais leu di Europa y leu di e situacionnan cu tabatin den guerra. Hulanda e tempo ey a ofrece apoyo financiero pa esnan cu lo kier a bay biba y inverti den e colonianan di Reino. sr. Cohen a bay Curaçao, despues Surinam, y despues finalmente el a scoge pa forma su bida na Aruba.

Aki el a cuminsa cu un compania di verf edificio y bibando na forma humilde el a cuminsa traha cu curashi y optimismo y cu determinacion. Na 1964 el a gana suficiente cu e por a cumpra Coral Strand hotel, motiva pa sr. Oscar Henriquez (man drechi di Juancho Yrausquin) kende tabata motiva empresarianan pa inverti y pa kere den Aruba. Despues sr. Cohen y su casa a cambia number di e hotel pa Talk of the Town Hotel y a sigui inverti cu construcion di Mancheo Beach Resort y mas compania. Asina creando miles di cupo di trabao pa nos hendenan y promove artisanan local pa entretere

nan huespednan.

Durante di su ultimo añanan sr. Cohen a dedica su aniversario pa recauda fondo pa obranan di caridad y yuda fundacionnan social. Riba un 23 di september, 15 aña pasa, sr. Ike Cohen a fayece na edad di 96 aña.

"Asina Aruba a conoce mas pionero den turismo cu awe ainda ta cu nos, manera por ehempel sr. Michael Kuiperi, sr. Rori Arends y sr. Harold Malmberg. Awe despues cu Aruba a pasa den e pio crisis di historia cu e pandemia, ta e legado aki di nos lidernan pionero y visionario combina cu lucha estatal di Libertador Betico Croes y combina cu determinacion di tur esnan cu a traha den sector di hotel y restaurantnan, a motiva nos pa lanta back cada dia cu animo y determinacion pa traha duro pa nos recuperacion despues di cada crisis atrobe. P'esey ta gradici sr. Juancho Yrausquin y sr. Ike Cohen pa nan esfuerso cu determinacion pa realisa nan vision di turismo pa Aruba", Prome Minister Evelyn Wever-Croes a expresa.



AANKONDIGING

Bij exploit van 26 september 2022 van de deurwaarder Bernard R. Roos, waarvan een afschrift is gelaten aan de Directeur van de DWJZ op Aruba, die het origineel voor GEZIEN heeft getekend, is: **DRIVE MOTORS N.V.**; zonder bekende vestiging en/of kantoorhoudende plaats op Aruba of elders, **OPGEROEPEN:** om op **DONDERDAG. EERSTE (1ste) DECEMBER 2022** des voormiddags om 08:30 uur; ter terechtzitting van het Gerecht in Eerste Aanleg van Aruba, gevestigd aan het adres J.G. Emanstraat nr. 51 op Aruba, te verschijnen teneinde op het door **Esther Jolanda Inocencia-Tromp** ingediend verzoek te worden gehoord.

De deurwaarder voornoemd,
Bernard R. Roos